

## REVISTA SITUASAUN AGOSTU 2015

### ASUNTU NE'EBÉ PRESIZA TAU ATENSAUN

- ▶ Lider Konsellu Revolusaun Maubere (KRM) Mauk Moruk ho nia membru na'in 3 mate tanba tiru malu ho Forsa Empeñamentu Operasaun Konjunta (EOK) iha Venilale, Baukau;
- ▶ “Joven Ho Violénsia” hamutuk insidente 54 iha fulan Agostu, no konsidera nudár número aas liu dezde Agostu 2014 to'o Agostu 2015.

#### LIDER KONSELLU REVOLUSIONARIU MAUBERE (KRM) – MAUK MORUK HO NIA MEMBRU NA'IN TOLU MATE TANBA TIRU MALU HO FORSA EMPEÑAMENTU OPERASAUN KONJUNTA IHA VENILALE, BAUKAU

Hahú husi inísiu fulan Janeiru 2015, Estadu no Povu Timor-Leste sente preokupa ho atividade no movimentu Grupu Konsellu Revolusaun Maubere (KRM) ne'ebé lidera husi Paulino Gama 'Mauk Moruk' iha Munisípiu Baukau. Grupu KRM halo asaltu balun ba Polísia hanesan iha Suku Saelari, Postu Administrativa Laga iha loron 15 Janeiru no Postu Administrativa Baguia iha loron 08 Marsu 2015, ne'ebé kauza membru polísia balun hetan kanek, estraga fasilidade no hadau polísia nia pistola balun. Ho ida ne'e mak Parlamentu Nasionál hasai rezolusaun hodi halo aproximasaun no atuasaun liu husi Forsa EOK. Meius aproximasaun ho negosiasaun ne'ebé halo la susesu no to'o ikus iha loron 08 Agostu, maizmenus tuku 04.00 lokraik akontese Membru Forsa EOK tiru mate Lider KRM – Mauk Moruk ho nia elementu na'in rua iha Suku Watuhaco, Postu Administrativa Venilale, Munisípiu Baucau. Enkuantu, elementu KRM ida seluk mós EOK tiru mate iha Suku Fatulia, Postu Administrativu Venilale, iha loron 3 antes. (Nota: Postu Administrativu Venilale la kobre area monitorizasaun Sistema Atensaun no Responde Sedu (AtReS), maibé insidente ne'e iha ligasaun ho insidente ne'ebé akontese iha Laga no Dili. Iha Munisípiu Baukau, AtReS kobre de'it Postu Administrativu tolu hanesan Baukau Vila, Vemasse no Laga. Tanba ne'e, insidente akontese iha area Venilale la inklui iha sistema database AtReS, no mós la inklui iha 'charts' iha pájina tuir mai).

Tensaun oioin mosu iha comunidade nia leet, liu-liu husi família matebian Mauk Moruk ho nia elementu sira la simu no protesta maka'as desizaun política no atuasaun husi Forsa EOK ne'ebé kauza sira nia família mate, inklui mós prosesu autópsia ba mate isin iha Ospitál

Totál Insidente fulan Agostu 2015	
Munisípiu	Insidente
Aileu	3
Ainaru	8
Baukau	9
Bobonaru	4
Covalima	6
Dili	42
Ermera	5
Lautein	7
Likisá	8
Manatutu	2
Manufahi	5
Oekusi	3
Vikeké	8
<b>Totál</b>	<b>110</b>

Nasionál Guido Valadares (HNGV) ne'ebé la husu lisensa ba família sira. Durante mate isin Mauk Moruk ho ninia elementu rai iha Dili hodi hein família husi Olanda mai Timor, akontese insidente rua ne'ebé AtReS rekolla. Insidente ida mak, membru família no apoiante Mauk Moruk balun halo protesta no tenta halo asaun hasoru membru PNTL sira ne'ebé fó seguransa iha Ospitál Nasionál Guido Valadares no iha Uma Matebian iha Metiaut. Insidente ida seluk, joven sira ne'ebé triste ho Mauk Moruk nia mate tenta baku membru F-FDTL iha HNGV nia oin iha Bidau. Enkuantu insidente 2 seluk akontese iha loron 16 Agostu 2015, bainhira mate isin lider KRM ho nia elementu na'in 3 to'o iha Postu Administrativa Laga, ne'ebé mosu reasaun violénsia husi ema deskoñesidu hodi tuda rahun karreta Polísia Militar 3 no harahun mós vidru edifísiu Postu Administrativa Laga, maibé ho intervensaun husi família matebian rasik, conseje akalma fali situasaun.

#### “JOVEN HO VIOLÉNSIA” HAMUTUK INSIDENTE 54 IHA FULAN AGOSTU, NO KONSIDERA NUDÁR NÚMERU AAS LIU DEZDE AGOSTU 2014 TO'O AGOSTU 2015

Belun ho nia monitorizador sira rekolla insidente hamutuk 54 husi insidente 110 ho kategoria “Joven mak Sai Autór iha Konfliktu” ne'ebé akontese iha fulan Agostu. Número insidente ne'e konsidera aas liu konta husi Agostu 2014 to'o Agostu 2015. Iha mós tipu insidente ho karakterístika seluk ne'ebé envolve mós joven sira, no rejista ho número aas iha fulan Agostu kompara ho fulan sira antes. Insidente hirak ne'e mak hanesan;

- Tipu violénsia ne'ebé envolve juventude sira hanesan hun no abut konfliktu tanba “hemu tua no lanu”, hamutuk insidente 21. Número ne'e aas hanesan ho número insidente violénsia ne'ebé akontese iha Maiu 2015;
- Tipu violénsia “grupu asaltu malu” hamutuk 28 mak akontese iha fulan Agostu. Número ne'e aas liu konta husi Agostu 2014 to'o Agostu 2015. Insidente sira ne'e akontese foun-foun entre joven ida ho ida de'it, maibé sira ba bolu tan sira nia kolega hodi envolve iha insidente sira ne'e.
- Tipu violénsia “estraga propriedade” hamutuk 33, ne'ebé konsidera mós aas iha fulan Agostu, hafoin número insidente rejista ho número aas liu iha Juñu 2015 hamutuk insidente violénsia 36. Insidente sira ne'e hamosu tuda malu no asalta malu hodi estraga ema seluk nia propriedade. Bainhira grupu sira asaltu malu no tuda malu, mak comunidade sira nia uma no sasán sempre hetan estragu.


Atu kompriende dí'ak liu tan karakterístika insidente liga ho juventude, bele haree ezemplu insidente tuir mai: Iha loron 12 Agostu 2015, iha tuku 02.30 madrugada iha Suku Bairru-Pite, Postu Administrativa Dom Aleixo akontese grupu joven tuur hemu tua hamutuk to'o ikus lanu, provoka grupu joven seluk, hodi tuda malu no estraga comunidade nia uma. Bazeia ba verifikasaun informasaun, joven sira husi suku seluk mak ba halo provokasaun ho joven sira iha fatin ne'ebá ho kondisaun lanu. Joven sira ne'e tuda malu hodi kona fali

komunidade sira nia uma no harahun vidru janela balun. Polísia mak halo atuasaun ba insidente ne'e, maibé la rezolve tanba joven sira halai lakon.


Insidente violénsia ho kategoria "Joven mak hahú halo violénsia", akontese barak iha Munisipiu Dili ho total insidente 19; Vikeké insidente 8; Lautein no Ermera ida-idak ho insidente 4, enkuantu Covalima, Aileu no Likisá ida-idak ho insidente 3, Ainaru, Bobonaru, Manatuto, Manufahi ida-idak ho insidente 2, Oekusi no Baukau mak ida-idak ho insidente 1.

### KARATERÍSTIKA INSIDENTE


Total Insidente: Agostu 2015




### Insidente Fatin




### Metodu Violensia



### Tipu Violensia




### See Mak Hahu / Halo Violensia?




### Ema Ne'ebe Hahu Violensia Nia Jeneru saida?




### Vitima Nia Jeneru Saida?




### Hun no Abut Konfliktu



### See Mak Responde?





### ATIVIDADE PREVENSAUN NO RESPONDE BA KONFLITU

#### Atividade Ne'ebé Hala'o Husi Ekipa Atensaun no Responde Sedu (AtReS)

- ▶ Atu halo prevensaun ba konflitu ne'ebé akontese iha comunidade, mak Belun ho nia Sistema AtReS, liu husi Rede Prevenaun no Responde Konflitu (RPRK) Postu Administrativa Maubisse, Munisípiu Ainaro, hamutuk ho comunidade husi Suku 9 harii tara bandu iha Maubisse. Serimónia ba tara bandu ne'e hala'o husi loron 28 – 30 Agostu 2015. Liu husi tara bandu sei asegura ekonomia povu nian, dudu edukasaun ho sustentável, suporta comunidade nia ekonomia iha moris loro-loron. Alende ne'e, tara bandu mós hanesan dalan ida atu redús kustu ba serimónia kultura no ema hotu bele implementa no tau oportunidade aas ba edukasaun, ekonomia no saúde, hodi comunidade bele moris di'ak.



- ▶ Problema entre comunidade, inklui problema animal tama to'os no estraga ambiente dala barak hamosu preokupasaun comunidade iha Suku Mahaquidan, Postu Administrativa Alas, Munisípiu Manufahi. Liu husi konkordánsia husi comunidade no lideransa lokál sira hanesan mós membru ba RPRK hodi realiza lei tara bandu hodi regula movimentu animal iha comunidade nia toos, no hodi halo prevensaun ba konflitu iha futuro, tanba ne'e iha dia 14 Agostu 2015, RPRK hala'o atividade aprova ba lei tara bandu iha suku Mahaquidan atu prevene konflitu ne'ebé comunidade sira hasoru.



#### Atividade Ne'ebé Hala'o Husi Ekipa Mediasaun no Rezolusaun ba Disputa (MRD)

- ▶ Ekipa MRD iha fulan Agostu foku ba dezenvolve matéria treinamentu mediasaun nian. Treinamentu ne'e hala'o iha edifísiu DTPSC Bobonaru ba Konsellu Suku 5 hanesan Suku Holsa, Suku Odomau, Suku Ritabou, Suku Raifun no Suku Lahomea, inklui mós ekipa DTPSC.

### KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konflitu husi koleasaun dadus monitorizasaun liuhosi Sistema Atensaun no Responde Sedu (AtReS), ne'ebé kobre iha postu administrativu 43, suku 208, husi Postu Administrativa 65 iha Timor-Leste durante Agostu 2015. Belun esforsu atu fahe informasaun ne'ebé up-to-date no serteza ho dadus atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus ne'ebé ami iha liu husi sistema AtReS.

**Marilia Oliveira da Costa**, Jestor Sistema AtReS: [bylah.belun@gmail.com](mailto:bylah.belun@gmail.com)

**Laurenius Lein**, Espesialista Prevenaun Konflitu & Polítika: [laurenius.belun@gmail.com](mailto:laurenius.belun@gmail.com)